



**TEKS UCAPAN
YAB DATUK SERI UTAMA HAJI SULAIMAN BIN MD ALI
KETUA MENTERI MELAKA
SEMPENA
SAMBUTAN ULANG TAHUN RTM KE-75
TARIKH: 1 APRIL 2021 (KHAMIS), MASA: JAM 9.20 PAGI
DI AUDITORIUM RTM MELAKA**

بِسْمِ اللَّهِ الرَّحْمَنِ الرَّحِيمِ

الْحَمْدُ لِلَّهِ رَبِّ الْعَالَمِينَ، وَالصَّلَاةُ وَالسَّلَامُ عَلَى سَيِّدِنَا
مُحَمَّدٍ أَشْرَفِ الْمُرْسَلِينَ، وَعَلَى آلِهِ وَصَحْبِهِ أَجْمَعِينَ.

Assalamualaikum Warahmatullahi Wabarakatuh,
Salam Sejahtera, Salam Melakaku Maju Jaya, Rakyat
Bahagia, Menggamit Dunia.

Terima Kasih Pengacara Majlis;

**Yang Berusaha Encik Mohd Yusni Mohammed Ali,
Pengarah Penyiaran Melaka;**

**Yang Berusaha Encik Fitri Al-Ibni Nadzri,
Timbalan Pengarah Penyiaran Melaka;**

**Seterusnya, Tuan-tuan, Puan-puan, Rakan-rakan
Media, Hadirin Dan Hadirat Yang Saya Hormati
Sekalian.**

MUKADIMAH

1. Apa kabau warga RTM Melaka dan MELAKAfm pagi ini? Sihat semuanya? Kalau sihat, Alhamdulillah.

Alhamdulillah, syukur ke hadrat Allah S.W.T., dengan izin dan kasih sayang-Nya jua, kita dapat sama-sama berhimpun pada pagi ini, bagi meraikan Sambutan Hari Ulang Tahun RTM yang ke-75.

2. Terlebih dahulu, bagi pihak Kerajaan Negeri Melaka, saya ingin mengucapkan setinggi-tinggi penghargaan dan terima kasih kepada semua warga kerja RTM Melaka kerana sudi menjemput saya untuk bersama-sama meraikan sambutan hari besar lagi bersejarah kepada organisasi tuan-tuan dan puan-puan di Negeri Melaka ini walaupun kita masih lagi dalam tempoh Perintah Kawalan Pergerakan Pemulihan (PKPP).

3. Justeru, pada kesempatan ini, saya mengucapkan tahniah dan selamat menyambut Hari RTM ke-75. Walaupun telah menjangkau usia lebih tujuh dekad, namun RTM sebagai stesen penyiaran tertua di negara ini terus relevan, teguh dan unggul serta menjadi pilihan utama sumber informasi berita kepada masyarakat di seluruh pelosok negara termasuk di Melaka ini.

Saudara dan saudari yang saya hormati sekalian,

PERANAN RTM

4. Saya sangat menghargai jasa dan sumbangan warga RTM Melaka dalam menabur bakti kepada Kerajaan Negeri Melaka serta seluruh rakyat Melaka khususnya. Saya tahu, peranan RTM Melaka sememangnya penting sebagai medium penyampaian berita dan informasi yang berkesan, untuk membantu usaha pembangunan negeri dan negara amnya, selain membantu menyemai perpaduan dalam jiwa seluruh rakyat Malaysia amnya dan di Melaka khususnya.

5. Apa yang boleh saya katakan, semua warga RTM sangat berbakat, profesional dan kreatif dalam menggalas amanah yang telah dipertanggungjawabkan kepada anda semua. Lebih-lebih lagi, pada masa negara berhadapan dengan pandemik COVID-19, RTM terus memainkan peranan sebagai penyiar utama yang diyakini dalam menyiarkan pengumuman rasmi situasi perkembangan semasa COVID-19 tanpa mengira masa dan situasi, sekali gus mengelakkan penyebaran berita palsu yang mengelirukan rakyat.

6. Kerajaan Negeri Melaka menyanjung tinggi peranan yang dimainkan oleh warga RTM dalam menyebarkan luaskan segala informasi dan dasar kerajaan negeri kepada rakyat Negeri Melaka. Ia meliputi semua aspek pembangunan negeri seperti ekonomi, kesihatan, pelancongan dan banyak lagi.

7. Malah, saya turut diberi peluang untuk ke udara secara langsung di corong radio MELAKAfm melalui program “Bicara Ketua Menteri” setiap hari Khamis sebulan sekali. Program selama 30 minit ini, membolehkan saya menyampaikan perkembangan terkini berhubung pembangunan negeri. Saya yakin, rakyat khususnya pendengar MELAKAfm akan mendapat penjelasan yang tepat daripada saya, lebih-lebih lagi sekiranya ada persoalan yang dibangkitkan melalui *whatsapp* dan laman *facebook* MELAKAfm.

Saudara dan saudari, warga RTM yang saya hormati sekalian

PENUTUP

8. Saya berharap, RTM Melaka terus berperanan membantu kerajaan negeri mempromosikan sektor pelancongan yang merupakan sumber ekonomi utama Negeri Melaka menerusi liputan berita dan penerbitan rancangan-rancangan siarannya. Saya percaya dan cukup yakin dengan seluruh warga RTM sebagai stesen peneraju industri penyiaran yang diyakini di Negeri Melaka khususnya, dalam usaha membantu merancakkan kembali sektor pelancongan yang terjejas berikutan pandemik COVID-19.

9. Harapan saya, semoga RTM, yang terkenal sebagai suara penghubung antara kerajaan dan rakyat melalui acuannya yang tersendiri tanpa mengetepikan identiti, adat serta budaya ketimuran masyarakat berbilang kaum di negara ini terus cemerlang dalam menyalurkan maklumat dan hebahan terkini.

10. Terima kasih sekali lagi kepada semua warga RTM yang sentiasa memberikan kerjasama dan sokongan terhadap saya dan barisan kepimpinan Kerajaan Negeri Melaka serta semua lapisan masyarakat Negeri Melaka khususnya dalam melaksanakan

tanggungjawab dan peranan yang telah diamanahkan.

11. Akhir kata, RTM terus menjadi “Teman Setia Anda”. Selamat Menyambut Hari Ulang Tahun RTM ke-75. Sekian.

وَبِاللّٰهِ التَّوْفِيقِ وَالْهُدَايَةِ وَالسَّلَامُ عَلَيْكُمْ وَرَحْمَةُ اللّٰهِ وَبَرَكَاتُهُ